

大佛頂首楞嚴經大勢至菩薩念佛圓通章

唐天竺沙門般刺密帝譯

大勢至法王子、與其同倫、五十二菩薩、即從座起。

頂禮佛足、而白佛言。我憶往昔、恆河沙劫。

有佛出世、名無量光。十二如來、相繼一劫。

其最後佛、名超日月光。彼佛教我、念佛三昧。

譬如有人、一專為憶、一人專忘。如是二人、若逢不逢、或見非見。

二人相憶、二憶念深。如是乃至從生至生、同於形影、不相乖異。

十方如來、憐念眾生。如母憶子。若子逃逝、雖憶何為。

子若憶母、如母憶時。母子歷生、不相違遠。若眾生心、憶佛念佛。

現前當來、必定見佛。去佛不遠。不假方便、自得心開。

如染香人、身有香氣。此則名曰、香光莊嚴。

我本因地、以念佛心、入無生忍。今於此界、攝念佛人、歸於淨土。

佛問圓通、我無選擇。都攝六根。淨念相繼。得三摩地。斯為第一。